

TUSI TAIALA

MO LE PULEA MA LE VA'AIA LELEI O I'A MA FIGOTA

O LE AFIOAGA O



Iuni 24, 2004

SAUNIA:

Pule mamalu a Alii ma Faipule ma tagatanuu o le Afioaga o Matautu Falelatai faatasi ai ma le lagolagosua a le Ofisa o Faigafaiva o le Matagaluega o Faatoaga ma Faigafaiva.

FAALUPEGA

Paia i le Aiga Tauā'ana ma le latou Tama
Afio Faasavalu ma lona aiga
Alalatai Falelatai ma le tagata o le Vavau
Tula o Salogo ma vae o le nofo e fia

FAASOLOGA

	Faalupega	2
	Faasologa	3
1	Upu Tomua	4
2	Faamatalaga e uiga i le Afioga	5
	2.1 Faamatalaga o foliga va'aia faa-natura o le Afioga	5
	2.2 Faamatalaga Faaopoopo	6
	2.3 Faigafaiva	6
3	Tulafono i Aso ua Mavae ma Aso Nei	7
	3.1 Aotelega o Tulafono o Faigafaiva	7
4	Fuafuaga Tatau/ Tusi Taiala	7
	4.1 Autu	7
	4.2 Tapenaga	7
5	Fuafuaga Faataatitia a le Afioga	9
	5.1 Faamalosia tulafono - Faasaina le talafeagai: Fanaia, Ava niu kini, Vailaau Oona	9
	5.2 Ia faasa ona toe fagotaina mai I'a ma Figota Laiti	10
	5.3 Ia faamalosia tulafono e faasaina ai Tu'iga ma Faamo'a	10
	5.4 Faasaina lapiasi lafoai i le Matafaga/ Sami: uamea, atigi apa, pepa iila ma isi	11
	5.5 Ia faasaina Faigafaiva mai isi Afioga	11
	5.6 Ia Faasa le la'uina o maa, amu ma le oneone	12
	5.7 Faaagaina o mea manava (faguea) i Fagotaga	12
	5.8 Faasaina lama Moli-uila	13
	5.9 Ia aoina ma faatama'ia Alamea	13
	5.10 Ogasami Faasaina	14
	5.11 Tufaina atu ma le Faafaatoagaina o I'a ma Figota	14
6	Talosaga a le Afioga	15
7	Maliliega	15
8	Toe Iloiloina o Ienei Fuafuaga Tatau	15
9	Upu Mulimuli	16
10	Suafa o le Komiti o Ioo Nafa ma le Va'aia o le Faasao	16
11	Faamatalaga na Aoina i le taimi o le faatalatalanoaga i Vaega e Tolu	16

1. UPU TOMUA

O le faaitiitia o i'a ma figota i Samoa e afua mai i le anoanoai o mafuaaga eseese. O nisi o nei mafuaaga e aofia ai;

- le tanumia o vaega o le gataifale mo eleele-fou (fanua)
- le soona fagotaina faa-le-tatau o le gataifale e le aufaifaiva
- faaogaina o faigafaiva-le-talafeagai
- ma aafiaga mai i afa malolosi (Ofa 1990, Val 1991, Heta 2004) ua tuanai.

O nei faafitauli o loo tulai mai pea i gataifale o si o tatou atunuu ma o loo avea lea ma auala e faaitiitia ai i'a ma figota. O le faaitiitia o i'a ma figota, o le lē maua foi lea e tagatanuu o porotini mai nei meaai sami. O se atugaluga tele lea i le Malo o Samoa na mafua ai ona faatino nisi o tulafono e pei ona faailoaina atu i lalo.

Tulafono Autu Tau Faigafaiva

O le tausaga e 1988 na pasiaina ai e le Kapeneta le **Tulafono Autu Tau Faigafaiva** e faamalositia ai le (i) laiseneina o vaa-fagota mo fagotaga, (ii) faasaina le faia o faigafaiva-le-talafeagai i ogasami o Samoa. Peitai ane o nei tulafono uma e lei silafia e le toatele o tagatanuu o Samoa i ia vaiitaimi. O se tasi o mafuaaga ona o le toaitiiti ma le toagaogao o le aufaigaluega. Ae o se isi mafuaaga ua talitonu le taofi na faigata ona ausia ai lea tulaga ona e le'i iai se polokalame i lea vaiitaimi e pei o le Polokalame o le Faasao o le Gataifale mo Nuu ma Afioaga. O leni polokalame e pei ona faatinoaina nei, ua fesoasoani tele i le faa-malamalamaina mo le silafia e le mamalu o le atunuu o ia tulaga.

Tulafono Faatonutonu mo le Laiti o I'a ma Figota

I le tausaga 1995 na pasiaina ai e le Kapeneta le **Tulafono Faatonutonu e Faatapulaaina ai le Laiti o I'a ma Figota**. O leni tulafono na pasiaina ma le faamoemoe e tuu avanoa ma fesoasoani i le faasaoina o i'a ma figota ua tauau ina mou atu. O le faatapulaaina o le laiti o i'a ma figota e faataga mo le fagotaina ina ia ausia le lapopoa ina ia mafai ona tautuufua ma fanafanau e faatupulaia ai le faitau aofai o le tamaoaiga o le gataifale.

Tulafono Laiti

O **Tulafono Laiti** a nuu ma afioaga ua amanaiaina e le Faamasinoga. O se tasi lea o auala ua tuu sa'o ai e le Malo le malosi i nuu ma afioaga e mafai ai ona o latou molia i le tulafono soo se tagata e le usitaia tulafono ua aiaia i totonu o le Tusi Taiala a le afioaga o Matautu i Falelatai. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaaia lelei o le gataifale i tulaga o ona tamaoaiga ma lona siosiomaga mo se lumanai manuia. O tulafono laiti e soalaupuleina ma autasi iai le Pule Mamalu a Alii ma Faipule o afioaga taitasi.

Tala'aga : Polokalame o le Faasao o le Gataifale i Alalafaga ma Afioaga

O le Polokalame o le Faasao na amataina e le Ofisa o Faigafaiva i le tausaga e 1995. I le amataga mai la o leni polokalame sa lagolagoina malosi e le Malo o Ausetalia e auala ma i lana AusAID i le faa-tupeina mo le 5 tausaga seia oo mai i le tausaga e 2000 ma faamuta ai loa lana fesoasoani. I lea lava tausaga, sa tauaveina mai ai loa e le Malo o Samoa le faatupeina o leni polokalame taua. O le talitonuga ma le faamoemoe autu o le tele o nei afioaga o le silasila lea i le lumanai manuia mo tagata lautele o le afioaga aemaise ai o tupulaga lalovaa.

O le polokalame o le Faasao e galulue soosoo-tauau ai le ofisa ma afioaga taitasi i nisi o fuafuaga faataatitia auā se lumanai manuia aemaise o le toe faa-tamoaigaina o le gataifale. I le amataina o leni polokalame e faatinoaina ai ni faatalatalanoaga ma vaega eseese o le nuu e pei o le vasega o matai, tina ma aumaga. O nei feaasoaiga e faailoa mai ai faafitauli o loo faafeagai ma le gataifale o le afioaga. E talanoaina foi aafiaga ma mafuaaga o nei faafitauli ma soalaupule ai ni fofo. Sa soalaupuleina loa e Alii ma Faipule, tagatanuu o le afioaga ma le ofisa nisi o fuafuaga faataatitia e foia ai nei faafitauli. O se faataitaiga o se fuafuaga faataatia a le afioaga i leni polokalame o le faia lea o se ogasami faasao e faasa ona solia, kolosiina pe fagotaina foi.

O nisi o fuafuaga faataatitia e tele ona faaogaina e afioaga mo le pulea ma le vaaia lelei o tamaoaiga (i'a ma figota) o le gataifale e aofia ai le faasaina o;

- vailaau oona
- fanaia
- ava-niu-kini
- tuiga, faamoa, seuga
- le fagotaina o i'a ma figota laiti
- upega ma tili mataninii
- lama moli-uila i po

O nisi o fuafuaga o Tusi Taiala i le tele o afioaga mo le pulea tatau ma le vaaia lelei o le siosiomaga o le gataifale e aofia ai le;

- aoina o alamea (crown-of-thorn starfish)
- faasaina o le lauina o le oneone o matafaga
- faasaina le lafoai o lapisi i le gataifale (matafaga)

O lenei polokalame e taua tele mo le lumanai manuia o Samoa ma ona tagatanuu. O le faaleleia o le siosiomaga ma le faatuputupulaia o le tamaoaiga o le gataifale o se faamoemoe e talitonu e mafai ona faatinoina i o tatou lava lima. E faa-tauaina tele le lagolagosua a le Pule ma le Faamalumaluga a Alii ma Faipule o afioaga i lenei polokalame.

2. FAAMATALAGA E UIGA I LE AFIOAGA

2.1 Faamatalaga o foliga vaaia faa-natura o le Afioaga

Faitau aofai o tagatanuu o Matautu Falelatai	700
Tapuaiga i totonu o le afioaga o Matautu	E.F.K.S. Katoliko
Aofai o aoga i totonu o Matautu Falelatai	Aoga Tulaga Lua
Umi o le aau mai le tuaoi i Sasa'e e pa'ia le tuaoi i Sisifo	3000 mita
Mamao o le a'au mai pe a fuaina mai i le matafaga	1000 mita
Loloto o vaega aupito sili ona loloto pe a sua le tai	5 futu
Loloto o vaega aupito sili ona loloto pe a pe le tai	4 futu
Papa'u o vaega aupito sili ona papa'u pe a sua le tai	2 futu
Papa'u o vaega aupito sili ona papa'u pe a pe le tai	2futu

2.2 Faamatalaga Faaopoopo

E mamalu tele le pulega a Alii ma Faipule i totonu o faiganuu a le afioaga. O fautuaga lelei uma aua le sologa lelei o le taitaiina o le afioaga aemaise o mataupu tau lotoifale, e mapuna mai i le lelei o le fautua a tina, e faapena foi ona lava saunia le aumaga i taimi uma aua le tautuaina o matai.

O le faitau aofai o le afioaga ua faailoa atu i le pusa o loo i luga, e na o i latou o loo aumau i le afioaga i le taimi nei. E le o faitaulia ai i latou ua malaga atu i atunuu i fafo e iai Niu Sila, Ausetalia, le Iunaita Setete o Amerika ma isi atunuu.

2.3 Faigafaiva

Ituaiga Faiva	Taimi Faaalu	Tagata e faatinoina	Faapefea ona faaaoga
Maulu/ Matatao	2 itula	Alii	Faatau ma faaaoga mo le tausiga a le aiga
Pulu/ Laina	4 itula	Alii	Faatau ma faaaoga mo le tausiga a le aiga
Ofe	2 itula	Alii ma Tamaiti	Faaaoga mo le tausiga a le aiga
Upega	1 ½ itula	Alii	Faatau mo tupe maua a le aiga
Lama i le po	2 itula	Alii	Faatau mo tupe maua a le aiga
Aoina o figota	2 itula	Tama'ita'i ma Tamaiti	Faaaoga mo le tausiga a le aiga

Ituaiga I'a/Figota	Faigafaiva	Taimi faaaluu mo le tasi le tau'i'a ma ofu	
		Taimi nei	10 Tausaga ua tea
I'a maua soo			
1. Lo	Upega	2 itula	1 itula
2. Pone	Maulu, Matatao	4 itula	1 itula
3. Mataaleele	Upega, Laina	3 itula	2 itula
Figota maua soo			
1. Alili lapo'a	Ao	3 itula	1 itula
2. Faisua	Ao, Maulu	4 itula	1 itula
3. Sea	Tui sea	2 itula	1 itula

E tele ituaiga faigafaiva e mafai ona faatinoina i le aloalo o le afioaga o Matautu Falelatai. O nisi o nei faigafaiva e iai matatao, tosotoso ma le faaaogaina o upega mo le fofoga taumafa o le aiga pe faatau foi mo tupe maua. O le aoina ma le eliina o figota i luga o le aau, o le galuega patino lava lea i tina ma le fanau. Ae ua matua sa tapu tapu ona faatinoina faigafaiva le talafeagai e iai fanai'a, ava niukini ma vailaau oona i gataifale o le afioaga, i lalo o le Pulega mamalu a Alii ma Faipule.

O se tasi o faafitauli o feagai nei ma le afioaga, ona o le tele o i'a ma figota sa fai ma matai'ai o Matautu Falelatai i aso ua mavae, ae ua faigata tele ona toe maua i le taimi nei. O i'a o le aloalo e pei o lo, pone/aloga, fuafua ma mata'ele'ele sa tele ma faigofie ona maua i le 30 tausaga talu ai, peitai, ua faigata lava ona toe tau fagotaina i le taimi nei. E le gata i lea, ae o figota foi e iai le faisua, sea/loli/fugafuga/mama'o sa tele i aso ua mavae, ae ua pa'u maualalo lo latou faitau aofa'i i le taimi nei.

3. TULAFONO I ASO UA MAVAE MA ASO NEI (Siosiomaga o le Gataifale ma Faigafaiva)

3.1 Aotelega o Tulafono o Faigafaiva:

Tulafono a le afioaga o Matautu Falelatai i aso ua mavae.

Faasaina faigafaiva le talafeagai:

- Fanaia
- Ava niukini
- Vailaau oona

O nei tulafono sa faamamaluina ma amanaiaina e pei ona sa i ai i le taimi muamua i totonu o le afioaga o Matautu Falelatai. Ae peitai e le o mamalu nei tulafono i nei vai taimi ona o le lē amanaiaina e nisi tagata o le afioaga atoa ai ma isi afioaga.

O nisi nei o mafuaaga:

- Leai se lagolago mai le Malo
- O nisi tagata o loo mafaufau na o le taimi nei ae le mo le lumanai aemaise ona tupulaga.

O nei mafuaaga uma o loo aafia i le Fuafuaga mo le Pulega o le Siosiomaga o le Gataifale ma le Vaia Lelei o i'a ma figota.

E le gafatia e le malosi faaetulafono a le Malo ona malu puipua le siosiomaga o le gataifale ma ona tamaoiga. E utiuti tulaga tau tupe ma toagaogao foi le aufaigaluega a le Malo latou te faamalosi ma unaia tulafono tau faigafaiva i nuu taitasi o Samoa. O le fofo talafeagai o loo i aao lava o le pule a Alii ma Faipule o le afioaga. O le a le pine ona unaia tagata latou te galulue faatasi ina ia malupuipua ma faaleleia le siosiomaga o le gataifale ma ona tamaoiga mo nei ma tupulaga o le lumanai.

4. FUAFUAGA TATAU/ TUSI TAIALA

4.1 Autu

O le faamoemoe o leni fuafuaga tatau, e faamutuina ai faafitauli aemaise o ni fofo e talafeagai lelei ma le faafitauli ogaoga o loo pagatia ai nei le gataifale o le afioaga o Matautu Falelatai. O lea sa faia ai ni faatalatalanoaga i vaega uma o le afioaga, matai, tina ma aumaga ma autasi ai o latou finagalo faaalii i le autu o loo ta'ua i lalo.

"Ina ia puipua le siosiomaga o le gataifale"

"Toe faatupulaia i'a ma figota mo tupulaga i le lumanai"

4.2 Tapenaga

O le tapenaga atoa o leni Tusi Taiala, sa sailia ai e le ofisa o faigafaiva se finagalo o le pule mamalu a Alii ma Faipule. O faamaumauga uma o loo tamauiina ai i totonu o leni taiala, sa saunia ma faa'upuina lava e Alii ma Faipule o le afioaga o Matautu Falelatai. E le gata i lea ao le lagolagosua foi a ona tagatanuu aemaise o le taula'i o lo latou faatuatuga i le pitolaau a le Ofisa o Faigafaiva. O loo taua i lalo se ata o le tapega atoa o le leni fuafuaga tatau ina ua maea ni fonotaga sa faatinoina.

Feiloaiga Muamua

O le aso Tofi 22 Aperila 2004 sa faia ai se feiloaiga muamua poo le uluai fonotaga a le Ofisa ma le afioaga e faamalalama ai le polokalame o le faasao i le afioaga. O le aso foi lea na mataituina pe talia e le afioaga le polokalame pe leai. Sa auai ai le Fa'atonu Lagolago, Ali'i ma Tama'ita'i Ofisa e taliaina aloaia ai se finagalo o le afioaga. Ina ua manino le mata o le vai ma ua malamalama finagalo o le afioaga e ala i Alii ma Faipule, na tasi ai loa lo latou taofi ma le utaga loloto, e taliaina le polokalame o le faasao i gataifale o Matautu Falelatai.

Vaevaeina i Vaega

O le autu tonu o le vaevaeina i vaega taitasi nei e tolu, (Komiti a Matai, Komiti a Tina, Komiti a Aumaga) ina ia mafai ona faamatuu mai le finagalo o le tagata lava ia, e faailoa mai faafitauli o loo alia'e mai i le siosiomaga o le gataifale o Matautu Falelatai. E le gata i lea, e faailoa mai ai foi aafiaga o nei faafitauli, ae o a foi ni fofo e fo'ia ai. Na maea lea, ona tofua manatu mai lea o vaega eseese, poo ai latou te faatinoa fofo o faafitauli uma ua tā'ua. O lenei faatalatalanoaga sa faia i le aso 06 o Me, 2004.

O nisi nei o le afioaga na auai i faatalatalanoaga i Vaega e Tolu.

Komiti a Matai	Rev Tautiaga Senala	Peau Folo	Sila tonu
	Misa Galo (pulenuu)	Nanai Lalu	Sila Laki
	Misa Gae'e	Taii Toa	Sila Lealalii
	Nanai Ulufotu	Sila Liliva	Sila Pesamino
	Sila Tafu	Sila Perofeta	Sila Roni
	Nanai Moemai	Sila Fue	Sila Saipani
	Misa Lamoni	Sila Fogaega	Nanai Sopo
	Nanai Elia	Misa Malivao	Sila Moatoga
	Nanai Euta	Sila Fasia	Tuivaiti Toai
	Sila Uati		Ailao Liu
Komiti a Tina	Sinatata Sina	Alaai Sila	Laina Vili
	Fetaia Asi	Mema Sila	Sapi Tavita
	Fusi Tuivaiti	Kalaisia Sila	La Geo
	Repeka Nanai	Tasi Sila	Faafofo Tailua
	Olevia Faasavau	Makerita Sila	Nive Tuisaloga
	Tuia Tuivaiti	Salua Matai'a	Pai Tuivaiti
	Epenesa Sila	Pepe Sila	Aano Sila
		Maselina Faasavalu	
Komiti a Aumaga	Tavita Viliamu	Kekoli Toilolo	Neo Risati
	Mose Faasavalu	Malakai Neo	Sooipu Nanai
	Potoese Mailo	Apelu Sila	Asini Sila
	Faavae Anae	Manu Peni	Pili Nanai
	Isimasi Sila	Ailua Nanai	Ieremia Misa
	Pua Tepa	Levi Tavita	Apelu Sila
	Keilani Nanai	Sooipu Nanai	Vaisola Nuuausala
	Matini Faasavalu	Lafaele Faasavalu	Niusila Seiuli
	Semo Nanai	Taletonu Sila	Gagaifo Nanai
	Manuele Nanai	Tautua Neo	Siamani Misa

Komiti Faufautua:

O le Komiti Faufautua o loo aofia ai sui sa filifilia mai vaega taitasi. O le Komiti Faufautua o la latou matafaioi o le galulue faatasi lea ma le Ofisa o Faigafaiva i le saunia ma le tapenaina o se ata faataitai o le Tusi Taiala. O lenei ata faataitai o loo tuufaatasia ai faamaumauga ma faamatalaga mai vaega taitasi. O lenei foi Tusi Taiala o loo aofia ai lagona o tagata o le afioaga i le puleaina o Faigafaiva ma le siosiomaga o le gataifale. Afai ae mautu, ona tuuina atu lea i le fono a matai mo ni fautuaga ma le pasiaina.

Tauaofiaga o le Fono Tele

Sa tauaofia lenei Fono i le Aso 24 o Iuni, 2004 mo le taliaina, fautuaina atoa ai ma se teuteuga o le fuafuaga muamua o le Faasao ma le Vaaia Lelei o I'a ma Figota. O le pasiaina o lenei Tusi Taiala, o le a mafai ai loa

e le afioaga atoa ona utagia uma tuutuuga ma aiaiga o le pulea lelei o le gataifale o Matautu Falelatai. O le a filifilia foi se Komiti mo le Vaaia Lelei o i'a ma figota.

5. FUAFUAGA FAATAATITIA A LE AFIOAGA:

O fuafuaga faataatitia o le faatinoina o galuega e foia ai faafitauli ua faailoa mai e vaega eseese o le afioaga. E lua (2) ituaiga fuafuaga faataatitia o:

(i) fuafuaga e faatinoina e le Afioaga

(ii) fuafuaga e faatinoina e le Ofisa o Faigafaiva

O nei fuafuaga o le a tuuina atu ai fautuaga ma fesoasoani i le tapenaina o le Tusi Taiala.

O fuafuaga faataatitia uma a le Ofisa o Faigafaiva e ao ona faamaonia muamua e le Faatonu Lagolago o Faigafaiva (ACEO) a le Matagaluega o Faatoaga ma Faigafaiva. O nei fuafuaga uma ua faamoemoe lo latou faataunuuna i le lagolagosua mai a le afioaga ma ona tagatanuu. O le a faaauau pea ona tuuina atu ni fesoasoani i le afioaga e ala i pepa o faamatalaga atoa ai ma le faia o ni mafutaga faaleaoga (workshops /trainings), i aoga, faalapotopotoga faa-le-Ekalesia ma isi ituaiga faalapotopotoga i totonu o le afioaga.

5.1 Faamalositia Tulafono faa-le-nuu e faasaina ai Faigafaiva le talafeagai e aofia ai : Fana'i'a, ava Niukini ma Vaila'au oona.

Otootoga:

O le manatu na mafuli iai finagalo faaaliga o le afioaga i vaega uma e tolu na faatalatalanoaina, e faapea o loo faaogaina pea e le tele o faifaiva nisi o faigafaiva le talafeagai mo fagotaga. Ua mautinoa le ma'ale'ale o aafiaga o nei ituaiga faigafaiva i le siosiomaga o le gataifale o le afioaga. Aua e le gata i le pepē ai o i'a, a'o le faaleagaina ai o le tele o le faalagolagomaga o i'a ma figota o le sami e pei o amu. O le faatamai'a o le gataifale i nei ituaiga faigafaiva, e mautinoa lava le tuutausage o se taimi e toe tau faafo'i ai i lona lelei faale-natura sa iai muamua.

Fuafuaga Faataatitia a le Afioaga:

Ua maituina le tulaga pagatia ua iai nei le gataifale o le afioaga o Matautu Falelatai. O lea ua a'e ai se finagalo autasi i le Komiti aemaise o sui o vaega uma o le afioaga na aofia i faatalatalanoaga, ina ia matua faamalositia tulafono e faasaina ai ona toe faatinoina soo se faigafaiva e le talafeagai i le gataifale. O le faaogaina o fana'i'a, vaila'au oona, ava niukini ma le anoano o metotia faale-tagata, ua matua sa tapu tapu ona toe faatinoina. O lea tulaga, o le a lafo lava le faamoemoega i le pule mamalu a alii ma faipule, aemaise o le lagolago malosi a tagatanuu o Matautu.

Fautuaga

Ia toe faamalositia ma faamamaluina tulafono ua taua i lalo a le afioaga mo le faasaina o faigafaiva le talafeagai.

Tulafono

"Mo le mamalu o le atunuu atoa, aemaise o tagatanuu o le afioaga o Matautu Falelatai: Ua matua faasaina lava ona toe faatinoina soo se ituaiga faigafaiva le-talafeagai i gataifale o Matautu Falelatai, e amata mai i le tuaoi i Sasa'e seia paia le tuaoi i Sisifo".

Faasalaga

So'o se tagata o le afioaga e solia lenei tulafono, o le a fai loa iai le finagalo o le pule mamalu a alii ma faipule, e ala i le faatulaieseina ma le nuu.

O tagata mai isi afioaga, o le a molia sa'o i le Tulafono Autu o Faigafaiva a le Malo o Samoa.

Fuafuaga Faataatitia a le Ofisa o Faigafaiva

O le a fesoasoani atu le Ofisa o Faigafaiva i le faatinoina o fuafuaga faataatitia uma a le afioaga, ma afaatasi ma le afioaga i le faatinoina o o' latou manaoga i luga o le tulafono.

5.2 Ia faasa ona toe fagotaina mai I'a ma Figota laiti.

Otootoga

O le fuafuaina tatau o fagotaga i i'a ma figota, o se itu talafeagai ma fetau lelei lea mo le faasaoina ma le toe faatupulaia o meaola o le gataifale. O se fuafuaga taua ina ia maua se isi laasaga o le ola faanatura o meaola laiti o le gataifale e tutupu ma fanafanau ai a'o lei fagotaina mai. O se popolega e avea ma atugaluga o le afioaga, aua afai ae faatupulaia pea le fagotaina o i'a ma figota laiti, o le a ogaoga se faafitauli e faafeagai ma le gataifale o le afioaga, aemaise i latou o loo faalagolago tele i le sami mo le tausiga o aiga, e le gata i lea o tupe maua. O le mea mautinoa, afai e faaauau pea ona fagotaina i'a ma figota laiti, o le a leai so latou sao i le faatamaoigaina o le gataifale, e le gata i lea o le a faaitiitia i'a maua seia oo lava ina mou malie ese atu lea tamaoiga.

Fuafuaga Faataatitia a le Afioaga

O le tausaga e 1995 na pasia aloaia ai e le Kapeneta le **Tulafono Faatonutonu e faatapulaaaina ai le laiti o I'a ma Figota** ma ua faaalua e le afioaga lo latou lagolagoina malosi o lenei tulafono. O le faamalosi o lenei ulafono i totonu o le afioaga, o le taoto lava i aao o le pule mamalu a alii ma faipule ae le gata i lea o le pulenuu ma le komiti. Ua latou lagolagoina foi le Pepa o Faamatalaga o loo taina ai le fua faatapulaa o le laiti o i'a ma figota.

Tulafono

"Ua matua faasa lava ona toe fagotaina i'a ma figota laiti mai le gataifale o Matautu Falelatai, e pei ona tamauina i le Tulafono Faatonutonu o Faigafaiva a le Malo o Samoa".

Faasalaga

Mo tagata o le afioaga e solia lenei tulafono, o le a faasalaina i le tai \$200.00.

O tagata mai isi afioaga, o le a molia sao i le Tulafono Faatonutonu o Faigafaiva a le Malo o Samoa.

Fuafuaga Faataatitia a le Ofisa o Faigafaiva

O le a fesoasoani atu le ofisa o faigafaiva e ala i le tufatufaina atu o le Pepa o Faamatalaga 6, o loo tusiaina ai fua faatapulaa o i'a ma figota e tatau ai ona fagotaina. E le gata i lea, o le tapenaina o tulafono e molia ai soo se tasi e solia lenei tulafono.

5.3 Ia faamalosi Tulafono e faasaina ai Tu'iga ma Faamo'a

Otootoga

O amu o le gataifale, o le nofoaga faa-le-natura lea mo le tele ma le anoano o meaola o le gataifale. E le gata o le maua ai o polipe e aai ai i'a laiti, ae o le malu puihua e fai ma o latou ofaga e sulufa'i ai mai o latou fili. Peitai, o tuiga po'o faamo'a o se ituaiga faigafaiva e ogaoga ma tūgā ona aafiaga i amu. E le gata ina nuti ai amu ma le maua ai se nofoaga mo le tele o i'a ma figota, ae faapena ona faatama'ia ai ma polipe o lo'o maua ai a latou mea'ai. Afai la ae faaauau pea ona faatinoina nei ituaiga faigafaiva, o le a mautinoa le faaitiitia o i'a maua i gataifale o le afioaga, se'ia oo lava ina mou malie ese atu.

Fuafuaga Faataatitia a le Afioaga

Na faaalua e vaega taitasi o le afioaga, e ui lava e le o toe vaaia nei ituaiga faigafaiva peitai e tatau lava ona faatu se tulafono e faasaina ai tu'iga ma faamo'a i gataifale o Matautu Falelatai. Na matua lagolagoina malosi e le komiti lea tulafono.

Tulafono

"Ua matua faasaina lava ona faatinoina tu'iga po'o faamo'a i gataifale o Matautu Falelatai".

Faasalaga

Soo se tagata o le afioaga e solia lenei tulafono, o le a faasalaina i le sala tupe e \$300.00. O tagata mai isi afioaga, o le a molia sa’o i le Tulafono Autu Tau Faigafaiva a le Malo.

Fuafuaga Faataatitia a le Ofisa o Faigafaiva

O le a fesoasoani malosi le ofisa i le faamautuina ma le faamalosia o lenei tulafono, e le gata i lea o le faamalamalamaina o le Pepa o Faamatalaga o ta’ua ai faamaumauga o le ogaoga o nei ituaiga faigafaiva. E lagolagoina malosi foi e le ofisa soo se fuafuaga a le afioaga e faasaina ai amu o lo latou gataifale.

5.4 Ia Faasaina ona toe lafoai Lapisi e pei o uamea, atigi apa, pepa iila ma soo se ituaiga lapisi i le sami ma le matafaga.

Oototoga

O le tele o lapisi lafoai i le sami ma le matafaga, o le ogaoga foi lena o aafiaga e tulai mai ai i tua. O le a le gata ina faamanu’alia le aufaifaiva, ae le gata i lea o fanau laiti e tafatafao ai i le matafaga. O le isi itu e vaavaai totoa iai, ona e le gata i faafitauli ua taua i luga, ae o le a sili ai ona tele se aafiaga o le siosiomaga. O le manogi o lapisi, palapala ma `ele o uamea aemaise o otaota e le pala ma faatama’ia ai nofoaga o i’a ma figota e pei o amu ma togatogo. E le talafeagai foi i le silasila a le afioaga aemaise tagata tafafao maimoa mai fafo, le faalapisi o tagata i le matafaga.

Fuafuaga Faataatitia a le Afioaga

Ua finagalo le afioaga e faamalosia tulafono ma aiaiga uma e faasaina ai ona toe lafoa’i lapisi i le sami ma le matafaga. Ua saunia foi e le afioaga fata lapisi mo le aoina iai o soo se lapisi, ma latou lagolagoina foi le polokalame a le Malo mo le aoina o lapisi.

Tulafono

"Ua matua faasaina ona toe lafoai soo se lapisi i gataifale o Matautu Falelatai, aemaise otaota e pei o pepa iila, atigi fagu, atigi apa, uamea ma isi lava ituaiga lapisi".

Fuafuaga Faataatitia a le Ofisa o Faigafaiva

O faamatalaga eseese e faatatau i aafiaga o le siosiomaga o le gataifale ma ona tamaoaiga, lea o le fesoasoani atu ai le Ofisa o Faigafaiva e faamalamalama atili ai le afioaga. E le gata ina ia teu malu lapisi i nofoaga talafeagai, ae ia aotauina le afioaga e ala i le faamalamalamaina o le Pepa o Faamatalaga o loo iai le faamaumauga o lenei tulafono. O le a saunia se polokalame faapitoa i le televise e faalauiloa atili ai le tāua o le siosiomaga mamā.

5.5 Ia Faasaina Faigafaiva mai isi Afioaga

Oototoga

Ua maituina e le afioaga le faatupulaia o tagata fagogota mai isi afioaga o loo latou fagotaina gataifale o Matautu. E le gata i le fagotaina o le gataifale, ae o loo latou faaogaina foi faigafaiva le talafeagai ma ua atili ai ona utiuti le tamaoaiga e maua mai i aloalo o loo faalagolago iai le afioaga.

Fuafuaga Faataatitia a le Afioaga

O le faatupulaia o tagata fagogota mai isi afioaga, ua mafua ai ona a’e se manatu i le Pule Mamalu a Alii ma Faipule ina ia faia se tulafono e faasaina ai tagata mai isi afioaga, e fagogota i gataifale o Matautu Falelatai.

Tulafono

"Ua matua faasaina lava soo se tagata mai isi afioaga ona toe fagotaina gataifale o Matautu Falelatai"

Faasalaga

Soo se tasi na te le utagia mai lenei faasilasilaga, o le a molia sao loa i le Tulafono Laiti a le afioaga.

Fuafuaga Faataatitia a le Ofisa o Faigafaiva

O le a lagolago malosi le ofisa o faigafaiva i soo se fuafuaga a le afioaga e aliae mai ai le sologa lelei ma le alualu i luma o le puipuiga o le tamaoaiga o le gataifale o Matautu Faletai.

5.6 Ia Faasa le lauina o Maa, Amu ma le Oneone**Oototoga**

O le lauina ese o oneone mai le matafaga, o se gaoioiga ogaoga ona aafiaga i le siosiomaga lautele o le gataifale. O le a faateleina ai le malolosi o au e fafati mai i uta i le apitagalua ma le matafaga. E le gata i lea, ae ua avea le asuina ese o oneone, lauina ese o maa aemaise le toesea o amu o le gataifale, o le faaitiitia foi le o i'a ma figota maua i lea vaega o le gataifale, aua o le a leai ni nofoaga e ofaga i ai aemaise o so latou sulufaiga mai o latou fili.

Fuafuaga Faataatitia a le Afioaga

Na faaalua e le afioaga atugaluga ma aafiaga o le toesea lauina o ese o oneone, maa ma amu mai le gataifale. O lea ua maea tapenaina ai se taiala e aiaia ai le lauina ese o nei faalagolagomaga o le tele o meaola o le gataifale. O lea tulaga, o le a oo ai ina aafia meaola uma o loo faalagolago i nei vaega uma mo lo latou ola lelei.

Tulafono

"Ua matua faasaina lava ona toe asuina ese oneone, pe toesea foi maa ma amu o le gataifale o le afioaga o Matautu Falelatai".

Faasalaga

Soo se tasi o le afioaga e solia lenei tulafono, o le faasalaina i le tai \$200.00 i le tagata e toatasi. O tagata mai isi afioaga, o le a molia sao i Tulafono Laiti a le afioaga ma Tulafono Faatonutonu a le Malo o Samoa

Fuafuaga Faataatitia a le Ofisa o Faigafaiva

E tele le fesoasoani e mafai ona tuuina atu e le Ofisa o Faigafaiva e lagoalagoina ai mataupu e uiga i le lauina ese o oneone, maa ma amu o le gataifale o Matautu Falelatai. O le a tuuina atu foi pepa faamalamalama mo le aotelega o lenei mataupu.

5.7 Faaogaina o Mea-manava (fagu'ea) i Fagotaga**Oototoga**

Na faaalua e vaega taitasi o le afioaga e ala i faatalatalanoaga i Vaega e tolu, o loo latou maitauina pea le faaaogaina o mea manava e faifaiva, aemaise lava i tagata mai isi afioaga. O le faaaogaina o nei faguea, ua masalomia le faaaogaina faatasi ma nisi o faigafaiva le talafeagai e pei o ava niu kuni ma vaiala oona. E tele i'a e mafai ona maua mai i le faaaogaina o nei ituaiga faigafaiva, ma o le a oo atu i se tulaga ogaoga ma pagatia le tamaoaiga o le gataifale o le afioaga, pe afai o le a faaaauina pea lona faaaogaina.

Fuafuaga Faataatitia a le Afioaga

Ua fautuaina e alii ma faipule atoa ai ma aumaga o le afioaga le taofia ma le faasaina loa ona toe faaaogaina mea manava i ogasami uma o le afioaga o Matautu Falelatai. O lea na autasi uma ai finagalo faaalua o le

afioaga ina ia fausiaina se tulafono e faasaina ai nei ituaiga fagotaga i gataifale o Matautu Falelatai. Ua ta'ua foi le silasila totoa o le pulega mamalu a alii ma faipule i le tagata fagotaga mai isi afioaga o faaaogaina mea manava i a latou fagotaga.

Tulafono

"Ua matua faasaina lava soo se tagata ona toe fagotaina gataifale o Matautu Falelatai e faaaogaina ai mea manava poo faguea".

Faasalaga

O le faasalaga mo soo se tagata lava na te solia lenei tulafono, e \$500.00.

O tagata mai isi afioaga, e molia sao i le Tulafono Faatonutonu a le Malo o Samoa.

Fuafuaga Faataatitia a le Ofisa o Faigafaiva

O le a fesoasoani tele le Ofisa o Faigafaiva i le tufatufaina atu o pepa o faamatalaga e uiga i lenei ituaiga faigafaiva, ma faamalalama manino mo le silafia lelei e le afioaga o ona aafiaga.

5.8 Faasaina Lama Moli uila

Fuafuaga Faataatitia a le Afioaga

Na faaalua e le afoaga, o lama moli uila, o se tasi lea o auala e fesoasoani ai i le sailia o i'a ma figota mo le tausiga o aiga i aso taitasi. E le gata e faigofie, ae mafai foi ona maua ai ni i'a lapopoa ma talafeagai pe afai e faaaogaina ma le tatau. Ua fautuaina ai e le pule mamalu a alii ma faipule le mamalu o le au-tautai o le afioaga, ina ia faaaogaina tau lava o le moli uila i taimi o fagotaga. Peitai, afai ae faaaogaina le moli uila i faigafaiva le talafeagai e pei o ava niu kini, vailaau oona, faguea, poo le fagotaina mai o i'a ma figota laiti, o lona uiga o le a molia loa lea tautai i tulafono taitasi ua taua i totonu o lenei Taiala.

Fuafuaga Faataatitia a le Ofisa o Faigafaiva

Ua matua lagolagoina malosi e le ofisa le fuafuaga a le afioaga e faamautuina ai mataupu i tulafono taitasi ua ta'ua.

5.9 Ia aoina ma faatama'ia Alamea

Otootoga

O le alamea o se ituaiga o le aveau ma e nofo i luga o le aau. O lenei meaola na te aiina meaola ninii ua taua o polipe o loo tutupu mai ai amu. A oo ina faateleina lenei meaola, o le a faapena ona latou faatama'iaina se vaega tele o le aau ma pagatia ai le tele o meaola o loo faalagolago i le aau mo nofoaga ma meaai.

E LE MAFAI ona faaumatia pe tapeina le alamea pe a vaevaeina lona tino i le sami, aua e mafai e nei itutino ona faatupuina mai ai nisi alamea fou. E pau lava le auala e faaumatia ai lea meaola faalafua, o le aumaia i uta i le pau-matu e faamagoina ai pe tanuina ma avea ai ma faalelei palapala.

Ua faailoa mai e le afioaga, o le alamea o se tasi lea o mafuaaga o le pēpē o amu o le gataifale. E le gata i le faatama'iaina ai o amu ae aafia ai foi le soifua o tagata faifaiva, ma ua tuuina mai ai e le komiti se manatu ina ia faatama'ia alamea e ala i le aoina mai i uta i le pau-matu ma faamagoina ai pe fai ai foi se isi gaoiga e tapeina ai.

E leai se polokalame a le Malo ua fuafuaina e totogi ai le faatama'iaina o le alamea ae peitai e tatau ona autasi iai le afioaga i faatalatalanoaga o lenei faafitauli ogaoga. E mau foi le taofi a le afioaga, e sologa manuia le lumanai o tupulaga aemaise o le faasao o le gataifale, pe a faatinoina lenei galuega taua.

5.10 Ogasami Faasaina

Otootoga

O manatu felafoai o le afioaga na autasi iai, o le fausia lea o se ogasami faasao i le gataifale o le afioaga, ina ia vave faatupulaia ai le tamaoaiga o le gataifale o Matautu Falelatai. O lenei ogasami faasao, o le a faasaina ai amu, o le a'au aemaise o i'a ma figota ina ia maua le avanoa e tutupu lapopoa ai seia oo ina tautuufua ma fanafanau mo nisi meaola faaopoopo i le siosiomaga o le gataifale. O le autu taua lava o lenei faasao, ina ia faasaina i'a ma figota seia lapopoa, tautuufua ma fanafanau ma faapena ona feasioai ma salalau solo ai i ogasami o le gataifale e faatupuina nisi foi i'a i le tele o ogasami o Matautu Falelatai ua tuufua ma toagaogao meaola o aumau ai. O le a le pine ae manuia le afioaga aemaise o tupulaga lalovaoa o le afioaga.

Fuafuaga Faataatitia a le Afioaga

O manatu ma lagona faaalua o le pule mamalu a alii ma faipule o le afioaga na taulimaina e le ofisa, e faapea o le a latou filifilia lava se ogasami talafeagai e avea ma ogasami faasao. O le a latou fausiaina foi ni tulafono e matua faasaina ai soo tagata fagota ma soo se ituaiga faigafaiva ona faatinoina i totonu o le faasao a le afioaga.

Tulafono

"Ua matua faasaina soo se tagatanuu o le afioaga o Matautu Falelatai, atoa foi ma tagata mai isi afioaga ona fagotaina le ogasami faasao a le afioaga. E matua faasaina soo se ituaiga faigafaiva ona faatinoina ai. E le gata i lea, ua matua faasaina foi ona toe faia ai ni taelega, uia pe kolosiina foi e soo se tagata poo se vaa fagota lenei nofoaga faasao ua maea faailogaina".

Faasalaga

Soo se tagata lava o le afioaga na te solia lenei tulafono, o le a faasalaina i le \$1000.00.

O tagata mai isi afioaga, o le a molia sao i le Tulafono Laiti a le Afioaga.

Fuafuaga Faataatitia a le Ofisa o Faigafaiva

O le a fesoasoani tele le Ofisa o Faigafaiva i le faatinoina o iloiloga ma suesuega o le tulaga talafeagai o le gataifale mo le ogasami faasaina. O le a tauaao atu foi e le ofisa ni ata ma kopi o nei suesuega i le komiti o le faasao. E le gata i lea, ae o le a tuuina atu foi ni fautuaga ma faamatalaga uma mo le tausiga, pulea ma le vaaia lelei o le ogasami faasao, aemaise o le tapenaina o tulafono e mataituina ai le puipuia lelei o lenei ogasami.

5.11 Tufaina atu ma le Faafaatoagaina o I'a ma Figota

O le tufaina atu o i'a ma figota, e faamoemoe lea i le aumaia o i'a ma figota mai isi atunuu ma tufa atu i afioaga ua iai o latou ogasami faasao ma talafeagai lelei mo le ola lelei o meaola o le sami. Ae o le faafaatoagaina, e mo ogasami e talafeagai lelei ma le ola o i'a ma figota ua sauni e tausia. O le tufaina atu o figota ina ia tausia ma faaolaina i ogasami o afioaga ma alalafaga taitasi, e ao ai i le afioaga atoa ona filiga, pulupulu lima ma galulue faatasi ina ia ausia se taunuuga lelei.

Sa faaalua e le afioaga, o le tele o figota ma i'a sa maua i lo latou gataifale i tausaga ua mavae, peitai, ua pei o le emo o le mata le mou ese atu. E mautinoa lava le tele o figota e le toe vaaia i le taimi nei, e tuufesilisili manatu ma mafaufau, ailoga e toe maua mai. O lea ua talosagaina ai le ofisa ina ia mafai ona maua atu nisi figota e faafaatoagaina ma tausia i lo latou ogasami faasaina.

Fuafuaga Faataatitia a le Afioaga

Na autasi uma manatu o le afioaga ma latou faaalua ai, o le a latou mataituina ma vaaia lelei nei figota o le a tufaina atu mo le faafaatoagaina, aemaise o le mautinoa lelei o lo latou saogalemu mai le faaleagaina.

Fuafuaga Faataatitia a le Ofisa o Faigafaiva

O le a faia e le ofisa ni suesuega i gataifale e talafeagai mo le faafaatoagaina o figota, poo fea ogasami e maua uma iai manaoga mo le ola lelei onei meaola. Ona tufaina atu lava lea e le vaega tonu o loo nafa ma le tausia ma le vaaia lelei o lo latou ola saogalemu. E le gata i lea, ae o le asaunia foi e le ofisa ni aoaoga e faalamalamaina ai le olaga faa-natura o nei figota aemaise o le mataituina ma le tausia lelei.

6. TALOSAGA A LE AFIOAGA

E tele talosaga sa tuuina mai e sui o vaega taitasi i le faatalatalanoaga ma vaega e tolu o le afioaga. O nei talosaga sa faamautuina e le Komiti o le faasao i le latou fonotaga ma le ofisa.

O talosaga uma sa tuuina mai o loo faailoa atu i lalo:

- Ogasami Faasaoina mo I'a ma Figota
- Atina'e Faisua
- Tilapia
- Atina'e Pa'alimago
- Ali'ao ma isi ituaiga Figota
- Aoaoga faa-faigafaiva e auai ai sui mai le afioaga

7. MALILIEGA

Ua autasi ma malilie uma le afioaga aemaise le ofisa, o le a latou galulue so'oso'o tau'au i le faatinoina o galuega uma mo le puipuiga o le siosiomaga o le gataifale ma le manuia o tagatanuu. E le gata i lea ao le vaai totoa foi i le lumanai o alo ma fanau o le afioaga. O le a mafai ona maua le sini o le faamoemoe ma manuia uma taumafaiga ua fuafuaina, pe afai o le a faatinoina uma fuafuaga faataatitia ua tamauina i lenei Tusi taiala.

8. TOE ILOILOINA O LENEI FUAFUAGA TATAU

Otootoga

O le toe iloiloina o lenei fuafuaga tatau, o le vaaia lelei o i'a ma figota a le afioaga mo le sologa lelei pea ma le agai i luma, o le a fai lava ma galuega tumau a le komiti o le faasao ma le ofisa o faigafaiva. O lenei iloiloga e suesueina ai poo le a se 'ai o le faasao pe o maua ai se faamanuiaga mo le afioaga. E le gata i lea, ao le suesueina pe iai nisi suiga o le komiti, pe iai foi ni tulafono ua solia e nisi o le afioaga poo ni tagata mai isi afioaga, aemaise se auililiga maumaututu i le tulai mai o galuega faatino a le afioaga. E fesiligia ai foi le auunaga a le ofisa o faigafaiva poo faataunuuina uma tautinoga ma fuafuaga faataatitia ua taua i luga. O lenei foi iloiloga e lipotia ai le alualu lelei ae poo a foi ni faaletonu o aliae mai talu ona amataina le polokalame.

Fuafuaga Faataatitia a le Afioaga ma le Ofisa o Faigafaiva

Ua iai le maliliega a le afioaga ma le ofisa o faigafaiva, o le toe auililiina lenei fuafuaga tatau pe a maea le ono masina talu ona pasia lenei tusi taiala i le Fono Tele. O le a toe feutaga'i ai le Komiti ma le Ofisa i se aso o le a atofaina pe a atoa le ono masina.

9. UPU MULIMULI

O le auai o le afioaga o Matautu Falelatai i le Polokalame o le Pulea ma le Vaaia lelei o I'a ma Figota, ua mautinoa ae le manuia o le afioaga i oa o le gataifale i ni tausaga o i luma. O le manuia ma le alualu i luma o lenei polokalame, e faalagolago tele i le galulue faatasi o le afioaga i ona vaega eseese, aemaise o le Malo e taua atu i le Ofisa o Faigafaiva. E le gata i lea, ae sailia ai foi pe iai se ai o le tele o faatalatalanoaga ma fonotaga sa faia ao tau amata le polokalame.

O le polokalame lenei, e umi se taimi e faatalitali ai i sona tali fa'aaliali ma sona taunuuga lelei, ina ia silafia lelei e le afioaga. O i latou o le a talisapaia ma aeae i nei manuia, o tupulaga o le lumanai o le afioaga. O lea na ae ai se tofa i le afioaga ina ia faia se polokalame faapenei a le Malo, e fesoasoani ai i le toe tapu'eina mai o le tamaoaiga o le gataifale o le afioaga ua mou atu.

10. SUAFA O LE KOMITI O LO'O NAFA MA LE VA'AIA O LE FAASAO

Komiti Matai	Sila Moatoga Sila Faasia Nanai La'ulu Ailao Liu Nanai Faitele	Misa Rimoni Matai'a Kolio Misa Galo (pulenuu) Tuivaiti To'ai Sulufai Sila Ioane	Nanai Moemai Sila Faaiuga Faasavalu Meleke Misa Esau Asi Musi
Komiti Aumaga	Potoese Mailo Keilani Nanai Tiatala Anae	Faavae Anae Apelu Sila Etuale Misa	Pua Tepa Filipo Faasavalu Neo
Komiti Tina	Repeka Nanai	Fofoga Misa Christina Tuivaiti	Siaganoa Sila

11. FAAMATALAGA NA AOINA I LE TAIMI O FAATALATALANOAGA I VAEGA E TOLU

Taitai o Faatalatalanoaga: Talavou, Tusi, Fosi.
Tusia Faamaumauga: Iulia, Isaia, Teuila
Aso na faataunuaina ai: 06 Iulai, 2004

Autu: "PUIPUIGA o le SIOSIOMAGA o le GATAIFALE"

A'afiaga:

- Faaitiitia tagata fagogota
- Foliga mataga o le matafaga/ siosiomaga o le gataifale
- Faaleagaina nofoaga mo i'a ma figota ona o le tetele o tafega
- Faatama'ia le tele o i'a
- Leai se tupe maua
- Le lava taumafa maua mai i le sami
- Faasolo ina laiti i'a ma figota
- Lavevea mai alamea
- Le oo le tupu o i'a i le lapopoa e tatau ona oo ai
- Tele ina faamanu'alia tagata fagogota
- Le lelei ona mata'ituina tulafono

Faafitauli:

- Faasolo ina faaitiitia I'a ma Figota

Mafua'aga:

- Tele lapisi lafoai i le sami ma le matafaga
- Tele tagata fagogota mai isi afioaga
- Leai ni i'a maua
- Fagotaina o i'a ma figota laiti
- Faaaogaina faigafaiva le talafeagai, vailaau oona, ava niu kini ma fana'ia
- Tele afa malolosi

- Faaleagaina amu o le gataifale
- Tele alamea
- Ua le faamalosia tulafono a le Malo
- Faaaogaina mea manava (faguea)
- So'ona faaaogaina o vailaau i faatoaga

Tali:

- Faamalosia tulafono a le afioaga e faamama ai lapisi
- Aoina o lapisi
- Tulafono e faasaina ai faigafaiva mai isi afioaga (malo/ nuu)
- Tulafono o le fua faatapulaa o í'a ma figota
- Faamalosia tulafono
- Aoina o alamea
- Mana o talosaga

Faatinoga:

- Faamalosia tulafono
- Fautuaga ma faasalalauga i isi afioaga ma alalafaga
- Fausiaina tulafono faa-le-nuu ma le malo
- Faasalalauina tulafono
- Mana o Talosaga

O ai e Faatinoa:

- Pule mamalu a Alii ma Faipule
- Komiti a Tina
- Aumaga
- Ofisa o Faigafaiva (sui o le Malo)